

RECENZIJA

U elektronskom obliku dostavljen mi je rukopis knjige "NASLJEDNO PRAVO U SUDSKOJ PRAKSI" autora prof. dr Duška Medića, sudije Ustavnog suda Republike Srpske iz Banje Luke i Hase Tajića, publiste iz Sarajeva.

Sistematika ovog djela određena je tekstem Zakona o nasljeđivanju ("Službeni list SR BiH", broj 7/80 i 15/80 – ispravka) koji je dat u rukopisu. On je, međutim, samo polazna osnova za veliki rad autora na prikupljanju i klasifikaciji sudske prakse. Autori su skupili veliki broj sudskih odluka iz oblasti nasljednog prava, a zatim ih razvrstali po članovima (institutima). Sudske odluke su znalački birane iz mnoštva izvora. Najveća pažnja je posvećena odlukama sudova u Bosni i Hercegovini. U rukopis su uvrštene najznačajnije odluke Vrhovnog suda BiH i ostalih sudova u BiH, donesene prije raspada SFRJ, ali i odluke vrhovnih sudova (i ostalih sudova) entiteta, donesene poslije nastanka BiH kao samostalne države, sve do predaje rukopisa u štampu.

U Bosni i Hercegovini (u oba entiteta – Federaciji BiH i Republici Srpskoj) još uvijek se primjenjuje navedeni Zakon o nasljeđivanju. Član 12. Ustavnog zakona za provođenje Ustava Republike Srpske iz 1992. godine propisao je da će se, do donošenja odgovarajućih zakona i drugih propisa Republike, primjenjivati zakoni i drugi propisi SFRJ i SR BiH. Do danas nijedan entitet nije donio zakon o nasljeđivanju. Odluka dva autora – jednog iz Sarajeva, a drugoga iz Banje Luke da sačine ovo djelo, opravdana je i višestruko korisna. U Bosni i Hercegovini ovo je do sada najpotpunija kodifikacija sudske prakse iz nasljednog prava.

Djelo "SUDSKA PRAKSA IZ NASLJEDNOG PRAVA", po svom domašaju i potpunosti prevazilazi državne okvire Bosne i Hercegovine. Autori su u ovo djelo uvrstili i sudsku praksu vrhovnih i ostalih sudova republika bivše SFRJ, kao i sudsku praksu sudova samostalnih država koje su proistekle iz SFRJ. I ove sudske odluke svrstavane su poslije navođenja odgovarajućeg člana Zakona o nasljeđivanju BiH i one su ih potpunije ilustrovale. Rezultati napora autora su, i zbog toga, još vredniji, ali i opravdani. Naime, u drugoj Jugoslaviji donesen je jedinstven Zakon o nasljeđivanju ("Službeni list FNRJ", broj 20/55 i 19/65). On je važio sve dok nisu stupili na snagu amandmani XXX i XXXI na Ustav SFRJ iz 1971. koji su nadležnost za regulisanje materijalnopravnih nasljednih odnosa prenijeli na tadašnje republike i pokrajine. Na osnovu Ustava SFRJ iz 1974. republike i pokrajine su postale nadležne da donose i procesne pravne norme iz nasljednog prava.

Republike i pokrajine bivše SFRJ su u pretežnom dijelu preuzimale rješenja usvojena u saveznom Zakonu o nasljeđivanju. Na isti način su postupale i samostalne države nastale raspadom SFRJ. Većina rješenja u zakonima o nasljeđivanju ovih država i važećeg Zakona o nasljeđivanju BiH je skoro ista. Zbog toga je sudska praksa, koja se iskristalisala u tim državama o pojedinim institutima nasljednog prava, i danas značajna za primjenu Zakona o nasljeđivanju BiH.

Sudske odluke razvrstane su uz odgovarajuće članove Zakona o nasljeđivanju BiH hronološki, s obzirom na vrijeme kad su donošene – od najstarijih do najnovijih. Kao što je i uobičajeno, autori su prvo citirali sentence, a zatim navodili dio obrazloženja sudske odluke. Sjajna odlika ovog djela je navođenje potpunog izvora sudske odluke.

Ovo djelo je sveobuhvatan zbornik sudske prakse, pouzdan vodič za razumijevanje instituta nasljednog prava i rudnik u kome vrijedni i uporni čitalac može pronaći kristal čija će svjetlost obasjati i nejasna zakonska rješenja.

Imam čast i zadovoljstvo da izdavaču predložim da štampa rukopis autora prof. dr Duška Medića iz Banje Luke i Hase Tajića iz Sarajeva, "SUDSKA PRAKSA IZ NASLJEDNOG PRAVA".

Predlažem autorima da ovom sveobuhvatnom djelu dodaju i stvarni registar pojmova (koji bi pratio zakonski tekst) kako bi se olakšala njegova upotreba.